

Headlines

- राष्ट्रपति द्रौपदी मुर्मू होरें आखेआ ऐ जे देसै दे आर्थिक विकास लेई तगड़ी समुंदरी सुरक्षा अत्त लाजमी ऐ।
- मुख्मन्त्री उमर अब्दुल्ला होरें बिजली दी कटौती च कमी करने दी जरूरत पर जोर पाया ऐ तां जे उपभोक्ताएं गी कोई परेशानी नेई झल्लनी पवै।
- उपमुख्मन्त्री सुरिंद्र चौधरी होरें कठुआ दा चानचक्क दौरा लाइयै खानें सरबन्धी कथित गड़बड़िएं दे चलदे जिला खनिज अधिकारी गी मुअत्तल करी दित्ता ऐ।
- सुरनकोट च फौजै दे इक कैप पर ग्रनेड हमले दे मगरा बड़े स्तर पर तपाशी अभियान चलाया गेआ।
- शारजाह च अंडर-19 एशिया कप क्रिकेट प्रतियोगिता च भारत नै यू.ए.ई गी 10 विकेटें कन्नै हराई दित्ता।

<><><><><><>

Prez. Navy Day

राष्ट्रपति द्रौपदी मुर्मू होरें आखेआ ऐ जे भारत दी भूगोलिक स्थिति ते लम्मी समुंदरी रेखा, इस गल्लै दी तगड़ेयाई कन्नै हिमायत करदे न जे भारत इक म्हान समुंदरी ताकत होना लोड़चदा ऐ। उनें आखेआ जे भारत दी अर्थबवस्था लगातार बधै करदी ऐ ते एह्दे चलदे अज्ज पूरी दुनिया च भारत दा कद बी बधै करदा ऐ। उनें आखेआ जे देसै गी इस गल्लै दा पक्का जकीन ऐ जे स्हाड़ी नौसेना 2047 तगर विकसित भारत लेई समुंदरी सुरक्षा गी होर अगगे बधाने दा कम्म बखूबी अंजाम देग। ओडीशा दे पुरी च अज्ज नौसेना दिवस आह्ले समारोह गी संबोधित करदे होई राष्ट्रपति होरें पाकिस्तान कन्नै 1971 दी जंग च सर्वोच्च बलिदान देने आह्लें गी श्रद्धांजलि अर्पित कीती ते आखेआ जे उंदे बलिदान लेई राष्ट्र सदा उंदा कर्जदार रौह्ग।

<><><><><><>

President

राष्ट्रपति द्रौपदी मुर्मू होरें गलाया ऐ जे आयुर्वेद दे क्षेत्र च होर मता शोध होना लोड़चदा ऐ की जे एह् लोके दे जीवन दा अनत्रुट हिस्सा बनी चुके दा ऐ। उनें आखेआ जे आयुर्वेद दे इलाज कन्नै केई परानियें बमारियें दा बी इलाज मुमकन ऐ ते इसै लेई स्हाड़े देश दे मते सारे लोके आयुर्वेद दी दवाइयें उप्पर गै भरोसा करदे न। अज्ज पुरी च गोपाबन्धु आयुर्वेद महाविद्यालय दी 75में स्थापना दिवस दे मौके उप्पर बोलदे होई राष्ट्रपति होरें आखेआ जे केंद्र सरकार दा आयुष

मंत्रालय आयुर्वेद ते योग गी मते शा मते लोकें दे जीवन दा हिस्सा बनाने लेई सब्बै लोडचदे यत्न करा रदा ऐ तां जे लोक रोगमुक्त होइयै नरोआ जीन जीऽ सकन।

<><><><><><>

CM-PDD

मुख्यमंत्री उमर अब्दुल्ला होरें बिजली विकास विभाग गी बिजली कट च कमी करने लेई आखेआ ऐ। अज्ज जम्मू दे सिविल सचिवालय च बिजली विकास विभाग कन्नै लग्गी दी इक मीटिंग दौरान उमर अब्दुल्ला होरें मुतलका विभाग आसेआ ठंडू दे मौसम लेई कीती दियें तैयारियेंदा जायजा लैता। मीटिंग च बिजली दी सप्लाई सरबन्धी चुनौतियें बिजली की कटौती आहले कार्यक्रमें, राजस्व ते बड़ी मती ठंडू दौरान बिजली क्षेत्र दे कम्में-कारवाइएँ च सुधार करने सरबन्धी मुद्दे उपपर तफसलील चर्चा कीती गई। मुख्यमंत्री होरें इस दौरान बक्ख-बक्ख कम्में ते परियोजनाएँ दे ठोस ते माली प्रगति दा जायजा लैता। इस दौरान केंद्र प्रायोजित स्कीमें ते प्रधानमंत्री हुंदे विकास पैकेज दा बी जायजा लैता गेआ।

<><><><><><>

Houses

ग्रामीण विकास मैहकमे दे केंद्री मंत्री शिवराज सिंह चौहान होरें आखेआ ऐ जे सरकारै हर इक गरीब गी ओदा अपना पक्का मकान उपलब्ध करोआने दे जतनें गी जारी रखदे होई 2 करोड़ 95 लक्ख मकानें गी मंजूरी दिती ऐ। अज्ज नमीं दिल्ली च इक संवाददाता सम्मेलन गी संबोधित करदे होई उनें आखेआ जे पी.एम आवास योजना ग्रामीण दे तैहत अगले 5एँ बरें च 2 करोड़ शा मते घरें दा निर्माण कीता जह्ग। उनें दस्सेआ जे प्रधानमंत्री आवास योजना ग्रामीण दे तैहत 38 लक्ख मकान अलॉट कीते गे न ते एहदे लेई 10 ज्हार 600 करोड़ रपे जारी बी कीते गे न। उनें गलाया जे पी.एम जन-मन योजना दे तैहत बरे 2024-25 लेई खासतौर पर जनजातीय परोआरें गी 46 ज्हार शा मते मकान अलॉट कीते गे'न।

<><><><><><>

LS-Rail

देश च पिछले दस्सें बरें दौरान रेल दुर्घटनाएँ च बड़ी मती कमी आई ऐ। 2014-15 बरे च रेल दुर्घटनाएँ की गिनतरी 135 ही जेड़ी 2023-24 च घटिये 40 उपपर पुज्जी गई। एहदे बारै जानकारी अज्ज लोकसभा च रेलवे मंत्री अश्विन वैशणव होरें लिखित परते च दिती। मंत्री होरें आखेआ जे इस बरे अप्रैल शा नवंबर तगर 29 रेल दुर्घटना होइयां। मंत्री होरें आखेआ जे यात्रुएँ सुरक्षा भारती रेलवे की सब्बनें थमां बड़ी प्राथमिकता ऐ ते रेल यात्रा दौरान यात्रुएँ की सुरक्षा

लेई लोडचदियां गैहू पुट्टियां जा'रदियां न। उनें आखेआ जे एहदे तैहत गे 1 ज्हार 548 किलोमीटर रस्ते उप्पर कवच प्रणाली लागू कीती गेई ऐ।

<><><><><><>

ISRO-Reshedule

भारती अंतरिक्ष अनुसंधान संगठन-इसरो नै प्रोबा-3 अंतरिक्ष यान च किश गड़बड़ी दे सामने औने करी PSLV-C-59 दे प्रक्षेपण गी फिलहाल अगड़ा पाई दित्ता ऐ। एहू प्रक्षेपण कल संज्ञा 4 बज्जियै 12एं मिंटे पर कीता जाह्ग।

<><><><><><>

RNU-Raising Day

आकाशवाणी दा क्षेत्रीय समाचार एकांश जम्मू औंदी 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश केई सारे कार्यक्रमें दा आयोजन करै करदा ऐ। स्थापना दिवस आले रोज 6 दिसम्बर गी बडुलै साङ्गे 9 बजे, 30एं मिंटे दा इक विशेष कार्यक्रम प्रसारत कीता जाह्ग जेह्दे च क्षेत्रीय समाचार एकांश दी भूमका, जिम्मेवारिएं ते कम्म करने दे तौर-तरीकें दे अलावा, इत्थे कम्म करी चुके दे अधिकारिएं कन्नै गल्लबात बी शामिल होग। एह्दे अलावा संज्ञा 7 बजे बी 15एं मिंटे दा इक विशेष कार्यक्रम प्रसारत कीता जाह्ग जेड़ा इस मौके पर स्थाडे श्रोताएं ते जम्मू-कश्मीर दिएं नामवर हस्तिएं आसेआ भेजी जा'रदिएं शुभकामनाएं पर आधारित होग। आकाशवाणी जम्मू च तकरीबन 40एं बरें तगर अपनियां सेवां देई चुके दे साबका गोजरी समाचार वाचक, एनाउंसर ते कम्पीयरर मुंशी खान चौधरी होरें आकाशवाणी दे क्षेत्रीय समाचार एकांश दे स्थापना दिवस पर अपना बधाई संदेस भेजेआ ऐ।

अपने कर्मिएं दी हौसला-अफज़ाई लेई, ऐकती स्थापना दिवस दे मौके पर उनें'गी सम्मानित बी कीता जाह्ग जिंदे च 2024 बरे दे बेह्तरीन समाचार सम्पादक, डोगरी ते गोजरी दे बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मि दे सम्मान शामिल न। इस मौके पर 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैह्योग ते जोगदान देने आहलें गी बी सम्मानित कीता जाह्ग। साबका प्रोफेसर ते डोगरी संस्था जम्मू दे प्रधान प्रो. ललित मगोत्रा होरें बी इस सिलसिले च अपनियां शुभकामनां भेजियां न।

<><><><><><>

DMO

उप-मुख्यमंत्री सुरेंद्र चौधरी होरें अज्ज कठुआ दे जिला उद्योग केंद्र सीकॉप ते प्रदूषण नियंत्रण बोर्ड दा चान्न-चक्क दौरा लाया ते दफ्तरें दी कम्में कारवाइएं दा जायजा लैता। स्टाडे जिला संवाददाता नै जानकारी दित्ती ऐ जे खाने सरबन्धी कथित गड़बड़ियें दे चलदे डीएमओ कठुआ गी मुआत्तल करी दित्ता ऐ।

<><><><><><>

Granade

जम्मू-कश्मीर च अज्ज बडुलै पुंछ जिले च इक सेना दी चौकी उप्पर आतंकियें 2 ग्रेनेड सुट्टे। आकाशवाणी दे जम्मू संवाददाता नै जानकारी दित्ती ऐ जे आतंकियें पुंछ जिले दे सुरनकोट इलाके च आर्मी कैंप दे पिच्छे आर्मी पोस्ट उप्पर दो ग्रेनेड सुट्टे, जिंदे शा इक्क फटी गेआ ते मगरा तलाशी अभियान दौरान दुए ग्रेनेड गी माहिरें आसेआ नकारा करी दित्ता गेआ। हमले च कुसा नुकसान दी कोई खबर नेई ऐ। सेना ते पुलस आसेआ इलाके च तपाशी अभियान चलाया जा'रदा ऐ। होर मती जानकारी गी अजें बलगेआ जा रदा ऐ।

<><><><><><>

Jail-Srinagar

पुलसा दे काउंटर इंटेलीजेंस विंग नै अज्ज श्रीनगर दी सेंट्रल जेल च छापे मारे। हासल जानकारी मूजब, सीगे दे अधिकारिएं ते जवानें दी टीम नै बडुलै सवेला गै सेंट्रल जेल दी घेराबंदी करी लैती ते बैरकें दी तलाशी लैती। इस मामले च होर ब्यौरे गी अजें बलगेआ जा करदा ऐ।

<><><><><><>

University

जम्मू यूनिवर्सिटी प्रशासन नै कल थमां कैंपस च चऊं टैरें आहिलियें गड़ियें दे प्रवेश उप्पर पाबंदी लाने दा ऐलान कीता ऐ तां जे यूनिवर्सिटी गी हरा भरा रक्खेआ जाई सकै ते कार्बन उत्सर्जन च बी कटौती होऐ।

<><><><><><>

HADP-Samba

साम्बा दे राई-बाई मैहकमे आसेआ अज्ज पुरमंडल ब्लॉक दी घर खड़ा मदाना पंचैत च राई-बाई खेत्तर दे पूरे-पराते विकास सरबन्धी प्रोग्राम HADP बारै इक जागरूकता कार्यक्रम दा सरिस्ता कीता गेआ। आकाशवाणी दे साम्बा संवाददाता मूजब, इस दरान करसानें गी बक्ख-बक्ख सरकारी योजनाएं शा लाहू हासल करने दी प्रक्रिया बारै जानकार बनाया गेआ।

<><><><><><>

U-19 Asia

अंडर-19 एशिया कप च अज्ज भारत दी टीम नै मेजबान संयुक्त अरब अमीरात दी टीम गी 10 विकेटें कन्नै हराई दित्ता। शारजाह क्रिकेट स्टेडियम च खेड्डे गेदे इस मैच च टॉस जित्ते मगरा यू.ए.ई दी टीम नै पैहले बल्लेबाजी करदे होई 138 रणज बनाए। लक्ष्य दा पिच्छा करदे होई भारत दी टीम नै छडे 16 ओवरें ते 1 गेंद च बिजन कुसा नुकसान दे 143 रन बनाइयै मैच च शानदार जित्त हासल कीती। भारत दी तरफा वैभव सूर्यवंशी नै 46 गेंदें च 76 रणज बनाए ते Ayush Mhatre नै 51 गेंदें च 67 रन बनाए।

<><><><><><>

Hockey

मर्दे दी हॉकी जूनियर एशिया कप च अज्ज संज्ञा ओमान च भारत ते पाकिस्तान बश्कार फाइनल मुकाबला खेडेया जाग। मैच भारतीय समें मूजब संज्ञा साड्डे 8 बजे शुरू होग। भारतीय टीम नै इस पूरे टूर्नामेंट च कोई बी मैच नेई हारेआ ते लगातार इस त्री जित्त लेई पूरी चाल्ली तैयार ऐ।

<><><><><><>